


TEZAUUR LITURGIC

16 SEPTEMBRIE

**SLUJBA
SF.PREOT
ALEXIE MECEV
DE LA
MOSCOVA
AFLAREA ȘI ADUCEREA
MOAȘTELOR**



MOSCOVA, 2000



Месяца сентября в 16-й день Служба обретению и перенесению честных мощей святого праведного Алексия, пресвитера Московского

На велицей вечерни

На Господи воззвах: стихиры праздника 3 и
святого 5, глас 1.

Подобен: О дивное чудо:

О дивное чудо! Источник чудес, под землею
сокровенный, днесь преславно всем является, и
архиерейскими и святительскими руками в
церковь вносится. Веселися, граде Москва,
обретше сокровище нетленное, возопиим,
вернии, песненно глаголюще: праведный
Алексие, радуйся, тобою бо Господь дарует миру
мир и велию милость.

О преславное чудо! Престолу Святыя Троицы с
собором новопрославленных святых предстоит
праведный Алексей Московский. Во святой
храм телесне вселяется с похвальными песньми.
Мы же благодатныя помощи от святыни сия
ожидающе, тепле взываем: старче Алексие,
радуйся, духом присно с нами пребываяй, к
пастве твоя днесь мощами возвращаеши.

Иные стихиры, глас 4.

Подобен: Дал еси знамение:

Молитву и духовное бодрствование положи во основание пастырского делания, упование все возложи на благоволение Божие, в подвиге ежедневного совершения Божественных Тайн от начала служения подвизался еси, тяготы трудов и козни вражеския претерпев мужественно, благодатных даров удостоился еси. Не мудрованием разсудка, но пламенностью сердца Бога познавал еси, в помощи страждущим исполняя повеление владычне, старче праведне Алексие.

Глаголы твоя, исполненнии апостольския простоты и силы, глубины сердечныя достигают; заповедей Евангельских непреложность свидетельствует святость жития. Легкость благодатную получаху прежде отчаянныя, тяготу скорбей преложив на плеща твоя, милосерде отче; ты же, яко и прежде состраданием преисполнен, проси Претерпевшаго бремя Креста помиловати уповающих на тя, пастырю добрый Алексие.

Преподобных отцев обители Оптиной соделателю, в стольном граде старчествовати призванный, щедро раздавал еси людям мирстим неоскудевающим благодатныя дары пустыни: смирение, милосердие, радость, мир и

дар совершен - любовь. Любы вся терпит, любы есть исполнение закона, - неустанно проповедуя. Темже молим тя: воспламени в сердцах наших сея любви Божественный благодатный огонь, да ею движими, доброделанием и милосердием к ближним приблизимся ко Христу.

Слава, глас 6:

Приспе днесь праздник славного пренесения честных мощей твоих, праведне старче Алексие, созывая всех верно торжествовати, в память твою глаголюще: радуйся, старчества преподобных отец наследниче и праведных похвало и мудрый наставниче верным. Радуйся, миру светильниче всесветлый и утешителю милосердый. И ныне предстоя Христову Престолу, моли избавитися нам от всякаго гнева и скорби.

И ныне, праздника.

Прокимен дне. И чтения три преподобническая.

На литии стихиры, глас 1:

Днесь празднуем светло обретение и пренесение святых мощей праведного старца Алексия. Приидите, вси вернии, вкупе прославим Преплагаго Бога нашего, даровавшего нам сокровище неизъемлемо, граду нашему твердую стену, Отечеству крепкого предстателя, и

молитвенника о душах наших.

Яко заря светлая взыде, явление честных мощей твоих, святой праведный Алексие Московский, в страхе и радости оныя обретше, како достойно воспоем величие щедрот, преизобильно являемых тебе ради; покланяся святей раце, возблагодарим и прославим Сотворшаго вся.

Слава, глас 2:

Прославльшися в небесных, сущих на земли не остави, предстоящих и покланяющихся священным мощем твоим и взывающим: о пречудный старче Алексие, Престолу Троическому со дерзновением многим предстоя, моли избавити град и страну нашу от разорения и пленения вражия.

И ныне, праздника.

На стиховне, глас 5. Подобен: Радуйся: Радуйся, граде Москва, обретши сокровище нетленное, целебныя мощи праведнаго старца Алексия, яко пресветлую зарю солнечную, Божественною благодатию источающий преславная чудеса. Мы же, ликующе, возопиим: О, всечудне отче Алексие, пастырю маросейский и граду нашему похвало, и Церкви Православныя веселие, моли прославльшаго тя Господа даровати отечеству нашему мир и велию милость.

Стих: Свет возсия праведнику / и правым сердцем веселие.

Радуйся, Земле Российская, и торжествуй, днесь бо прославим Троицы Единосущныя вернаго служителя, старца Московскаго Алексия, кротостию бурю злобы умиряющаго, молитве и вере в неизреченное милосердие Божие научающаго, заблудших на стезю спасения наставляющаго. Того молитвами, Человеколюбче Господи, низпосли людям Твоим мир и велию милость.

Стих: Готово сердце его / уповати на Господа. Красуйся, Церковь Русская, пренесение честных мощей праведнаго Алексия возвеличи днесь, мы же песненными похвалы воспоим, глаголюще: радуйся, Божественная любви светильнице, радуйся, скорый помощниче бедствующим и недужных исцелителю, всемудрый наставниче ищущим спасения, покаяния и терпения скорбей очистительных проповедниче. И ныне не престай молоти Крест Претерпевшаго умирить мир и сплети души наша.

Слава, глас 8:

Близ Господь всем уповающим на Него, - тако наставлял еси чада твоя, боголюбиве отче, - милосердствует ко немощным и страждущим, и к распинающим Его грехми руке, объемлюще, с любовью простирает; Крестом двери райския

отверзает, причастники соделывая славы Своея. Темже и мы, празднующе днесь сие преславное торжество, с верою возопиим: молитвами праведнаго Алексия, Христе, Сыне Божий, помилуй и спаси ны.

И ныне, праздника.

Тропарь, глас 5:

Помози в бедах, утеси в скорбех, пастырю добрый отче Алексие, подвигом бо старчества миру просиявый, веру и любовь Христову во мраце беззакония исповедал еси, болезнуя сердцем о всех притекающих к тебе. И ныне за ны Бога моли, любовьию чтущия тя.

Ин тропарь перенесению святых мощей, глас 1: Милующим сердцем объемля притекающих к тебе, Алексие, старче праведный, молитвою врачуя душ и телес недуги, наставляя в вере, смирении и любви; во чадех данный ти талант сторицею умножил еси; Сергия священномученика, драгоценен плод, произрастил еси; мы же ведуще тя, яко чадолюбива отца и чудотворца, к раце мощей твоих припадающе, просим заступничества и водительства твоего.

На утрени

По 1-м стихословии седален, глас 1.

Подобен: Гроб Твой, Спасе:

Гроб, идеже положен был еси, во церковь твою днесь приносится, праведне, благоухание испускает приходящим верою, и праздник сей веселит сердца любящих тя. Ты же духом во святых пребываяй, у Престола Зиждителя моли за ны, чтущия тя.

Слава и ныне, праздника.

По 2-м стихословии:

Радуется Святая Церковь Христова, священные и чудотворныя мощи твоя обретше, Алексие преславне, и вся созывает славить Господа, Егоже моли даровати нам мирное жительство и веры православныя укрепление.

Слава и ныне, праздника.

По полиелее седален:

Память твоя божественная и светозарная днесь просия, старче Алексие, светлыми сиянии просвещаючи верно и благочестно празднующих обретение и пренесение честных мощей твоих; темже молим тя, яко верный покровитель храма сего, и града Москвы похвало всечестная, моли Христа Бога дарованней ти пастве сохранитися от всякаго

зла и спасительными стезями внити в селения вечныя славы Его.

Слава и ныне, праздника.

Прокимен, глас 4: Возвеселится праведник о Господе / и уповает на Него.

Стих: Услыши, Боже, глас мой, внегда молитимися к Тебе.

Евангелие от Иоанна, зачало 51.

По 50-м псалме стихира, глас 6:

Днесь ликует первопрестольный град Москва и вся Российская земля, обретше источник исцелений и чудес неисчерпаемый: святыя мощи старца праведнаго Алексия; благодатней радости исполняются верных сердца, величающе Творца всяческих, дивно прославльшаго угодника Своего.

Канон праздника, и святого, глас 8.

Песнь 1

Ирмос: Поим Господеви, проведшему люди Своя: Воспоим и прославим благосердие Владычне, даровавшего новый источник чудес и исцелений граду нашему: святыя мощи праведнаго Алексия.

Радости исполнишася людие вси, отче Алексие преславне, обретше сокровище нетленное:

священную раку мощей твоих.

Не отлучаяся николиже духом от словесных овец твоих, пастырю добрый, и на всякое прошение помощь скорую подавая, днесь убо и телесне пребывати с нами благоизволил еси.

Богородичен: Высота воистину и глубина неизреченна тайны Твоея, Пречистая: якоже бо изыде несказанно из Тебе Вышний от тления избавити хотя падшия грехом.

Песнь 3

Ирмос: Ты еси утверждение:

Ты еси молитвенным ходатайством святителя Филарета родися, избранниче Божий Алексие, той и имя нарече ти, отче.

От юности возгореся сердце твое послужити Богу чрез служение ближним; служению пастырскому благословением благочестивыя матери твоея направлен бысть.

Врачевати души, а не токмо телеса, избран быв, отче Алексие, повеление Владычне чрез послушание родившей тя исполнивше, целителем благодатным и чудотворцем соделался еси.

Богородичен: Ты еси спасение притекающих к Тебе, Мати всех Царя и Бога: Того молящи не престай о нас, молимся.

Седален:

Благоукрашается храм твой, праведне Алексие,
яко безценный бисер, священные мощи твоя
приемля, собиравюще верных множество и
гласом велием хвалу Вседержителю вознося,
преславная чудеса святаго ради угодника Своего
ныне, яко и во дни древния, являющаго.

Слава и ныне, праздника.

Песнь 4

Ирмос: Услышах Господи:

Скорби сердечныя твоя по преставлении
супружницы верной разсеяться повеле
светильник Кронштадтский Иоанн, в помощи
страждущим указа обрести утешение.

Преподобных отцев наследниче, в стольном
граде старчествовати призванный, столпов
оптинских соделателю изрядный, николиже в
любви к Богу и ближним не оскудевал еси.

Помраченныя учении лживыми века сего, не
витийством словес, но верою простою, ведением
сердечным и силою духа от пути погибельнаго
отвращал еси, старче богомудре.

Богородичен: Пренепорочная Мати Христа Бога
нашего, моли о нас, упование имущих на Тя, во
еже спастися нам.

Песнь 5

Ирмос: Утреннююще вопием Ти:

Исцеления источаеши различна, и недуги
утишаеши, и бесы прогоняеши, от Христа
благодать приим воистину, и радость даруеши
духовную, чудотворче Алексие.

Светозарен и исполнен Духа Божественнаго,
граду Москве явился еси, и ныне добродетелей
начаток подаеши дарования, приходящих
очищаеши язвы греховныя и от пагубных
страстей исцеляеши, праведне старче Алексие.
Силою великою Божественныя любви, сердцем
милующим и болезнующим о всякой скорбящей
душе, многия возстави ко спасению, досточудне
отче.

Богородичен: Предвозвещающая скорби грядущия,
слез течение со иконы чудотворныя
Феодоровския даровала еси узрети поющим Тя,
Мати и Заступница рода нашего.

Песнь 6

Ирмос: Ризу мне подаждь светлу:

Слова Божия служителю, разум богопросвещен
стяжал еси, не многими глаголы, но благодатию
Духа души, вверенныя ти, на правыя стези
направи, благодатный пастырю Алексие.
Божественных Таин благоговейный
совершителю, дара слезнаго стяжателю,

прозорливче и чудотворче, чающим спасения
испроси, старче праведне Алексие.

Во дни гонений на веру христианскую, ты, яко
кокош птенцы, собра чада твоя, молитвы
крылами защищая я от всякаго зла.

Богородичен: Нетленный источниче Божия
живоначалаго и спасительнаго всем
воплощения воспоим Марию Деву, Тоя ко
прозябением мы вси исцелехом.

Кондак, глас 2:

Велия труды любви и милосердия подъял еси,
праведный старче Алексие, от святаго пастыря
Кронштадтскаго благословение на помощь
страждущим прияв, беды и скорби людския яко
вериги на рамо свое возложи. Мы же ведуще тя,
молитвенника дерзновенна ко Господу, со
умилением зовем ти: моли Христа Бога спастися
душам нашим.

Икос

Како уразумеем величие святости твоя, отче
Алексие; бых человек, якоже и мы, потщихся же
от всея души угодити Единому Богу, не углебох в
тимении суеты мирския нозе твои, но на высоту
предстояния молитвеннаго премирно возшел
еси. Како по достоянию воспоем щедроты твоя,
яже преизобильно изливаеши на нас,

недостойных. Чудесы бо ты Бог прославляет и звать тебе научает. Темже, припадающе ко святей раце мощей твоих, со умилением вопием ти: радуйся, сраспинахся в жизни сей Распеншемуся за грехи рода нашего; радуйся, Лице Божие ныне зриши. Радуйся, лучами Божественныя любви согревающий унывающих и хладных верою; радуйся, ближняя и дальняя возлюби паче себе. Радуйся, в милосердии покровителю храма твоего чудотворцу великому Николаю подражателю; радуйся, во всяких обстояниях скорый помощник и утешителю. Радуйся, семейных нестроений исправителю и примирителю враждующих; радуйся, пороков и пагубных страстей искоренителю. Радуйся, Алексие, старче праведный.

Песнь 7

Ирмос: От Иудеи дошедше отроцы:
Погибающих от пороков и во отчаянии сущия,
яко и Василия, страстию пьянства прежде
одержима, исцели, отче преблагий.
Божественныя любви подражая, с плачущими
плакал еси, помощь чудесную тем подавая, яко и
Христос прослезися, воскресити хотя
четверодневнаго
Тяготы ближних носить, отвергнув себя,
помози, наставник святой, благое сие

намерение в сердце утверди; тако да исполним закон Христов.

Богородичен: Неискусобращная Пресвятая Дево, яже род человеческий избавляша прародительнаго осуждения, молися Сыну и Богу Твоему, спастися стаду Твоему невредину.

Песнь 8

Ирмос: Царя Небеснаго:

Отче Алексие, приими водительство душ наших, научи ходити пред Единым Богом, надеяться и веровати в неизреченное милосердие Его.

Поклоняющеся Живоносному Кресту честному, и твоя цельбоносныя мощи лобызающе, в вере, надежде и любви утверждаемся.

Патриаршее освобождение из темницы, тобою предреченное, свершися при погребении твоём, прозорливе старче, ныне же архиерейскими руками во храм твой возвращаеши, новыя чудеса возвещающе.

Богородичен: К Покрову Заступницы Усердныя притецем, вернии; тако же и праведный Алексий заповеда все упование на Ню возложить.

Песнь 9

Ирмос: Воистину Богородицу:

Яко служитель Небесный, с вышними ныне лики водворяешься, священнотаинниче, свет ведения духовного низпосли и благия помыслы вдохни в сердца воспевающих тя.

Яко чудотворец преславный, всем приступающим к раце мощей твоих, исцеления получить испроси и сквернения страстей погибельных изыми.

Духовно празднующе обретение и пренесение святых и целебных мощей праведного Алексия, величаем во Святей Троице Единого Бога, многими чудесы сия прославльшаго.

Богородичен: Тя, яко светел свещник невестественного Света, кадильницу златую Божественного угля, ручку и жезл, скрижаль Богописанную, ковчег святой, трапезу славы жизни, Дево, величаем.

Светилен:

Свете незаходимый, Христе, просвети нас сиянием Честного Креста Твоего и светлости святых сопричти молитвами угодника Твоего праведного Алексия.

Слава и ныне, праздника.

На хвалитех стихиры праздника 3
и праведнаго 3, глас 8.

Подобен: О преславнаго чудесе:

Радуйся, первопрестольный граде Москва,
ликуй, Церковь Христова совокупльшися, днесъ
созывает верных праведнаго Алексия торжество;
егоже песненными цветы увенчаем, зовуще: о,
светоносне старче Алексие, ты бо на путь
спасения множество заблудших наставляеши,
скорбящим душею Божественное утешение
даруеши, от бед и обстояний ограждаеши, и о
всех просящих тя с верою Всевышняго
умоляеши.

Душу положи за ближния, старче Алексие, чад
твоих сирых не оставити обещаю, пред исходом
рекл еси: Аз же присно с вами буду! И ныне
вечнуеши со Христом, Егоже всем сердцем
возлюбил еси, и Ему Единому в житии послужил
еси; мощми во храме святем твоём пребываеши,
и попечений о пастве не оставлявши, являя на
всяко дело благо незримую помощь твою.

Богоугодно поживши, Небесных обителей
достигл еси, добре стадо словесное упасл еси,
наставниче богомудре, темже со умилением
вопием ти: радуйся, кореню благий, от него же
за Христа пострадавый сын-священномученик
прозябе; радуйся, лоза многоплодная, во чадах
грозд зрел принесе. И ныне у Престола Святыя

Троицы не престай молити, да сопричтет и нас
Праведный Судия овцам избранного стада
Своего в страшный день Судный.

Слава, глас 6:

Днесь Патриарх со Архиерее и чины священных
пришедше, монаси и мирстих множество,
прияша пречестныя твоя мощи, отче Алексие, со
свещами и фимиамом честно провождающе, во
церковь твою приносят. Сие славное пренесение
празднующе, велегласно зываем ти: яко
Престолу Христову предстояй, праведне, не
престай моляся избавитися от всякаго вреда
вражия и спастися душам нашим.

И ныне, праздника.

На Литургии

Блаженны на 8: песнь 3 и 6. Прокимен, глас 7:
Возвеселится праведник о Господе и уповает на
Него. Стих: Услыши, Боже, глас мой, внегда
молитимися к Тебе. Апостол, зачало 311.

Аллилуиа, глас 4: Праведник, яко финикс
процветет и яко кедр, иже в Ливане,
умножится. Стих: Насаждени в дому Господни,
во дворех Бога нашего процветут.

Евангелие от Матфея, зачало 11.

Причастен: В память вечную будет праведник:

